

四庫全書

集部

欽定四庫全書

集部

簡齋集卷二

四

詳校官庶吉士

臣翁樹培

侍讀<sub>臣</sub>孫球覆勘

總校官縮修

臣

王燕緒

校對官中書

臣

石鴻翥

謄錄監生

臣

王永鎮

欽定四庫全書

集部四

簡齋集

別集類三 宋

提要

臣等謹案簡齋集十六卷宋陳與義撰與義

字去非洛陽人簡齋其號也登政和三年上

舍甲科紹興中官至叅知政事事迹具宋史

本傳是集第一卷為賦及雜文九篇第十六

卷為詩餘十八首中十四卷皆古今體詩方

回瀛奎律髓稱簡齋集中無全首雪詩惟以金  
潭道中一首有後嶺雪槎枒句編入雪類今  
考集中古體絕句並有雪詩與回所言不合  
蓋回所選錄惟五七言近體故但就近體言  
之非後人有所竄入也與義之生視元祐諸  
人稍晚故呂本中江西宗派圖中不列其名  
然靖康以後北宋詩人凋零殆盡惟與義文  
章宿老歸然獨存其詩雖源出豫章而天

分絕高工於變化風格道工思力沈摯能卓  
然自闢蹊徑瀛奎律髓以杜甫為一祖以黃  
庭堅陳師道及與義為三宗是固一家門戶  
之論然就江西派中言之則庭堅之下師道  
之上實高置一席無愧也初與義嘗作墨梅  
詩見知於徽宗其後又以客子光陰詩卷裏  
杏花消息雨聲中句為高宗所賞遂馴至執  
政在南渡詩人之中最為顯達然皆非其傑

構至於湖南流落之餘汴京板蕩以後感時  
撫事慷慨激越寄迹遙深乃往往突過古人  
故劉克莊後邨詩話謂其造次不忘憂愛以  
簡嚴掃繁縟以雄渾代尖巧第其品格當在  
諸家之上其表姪張嶠為作墓誌云公詩體  
物寓興清邃超特紆餘閎肆高舉橫厲亦可  
謂善於形容至以陶謝韋柳擬之則殊為不  
類不及克莊所論為得其真矣乾隆四十三

年四月恭校上

總纂官

臣

紀昀

臣

陸錫熊

臣

孫士毅

總校官

臣

陸

費

墀

費

墀

[illegible]



簡齋集原引

詩至老杜極矣東坡蘇公山谷黃公奮乎數世之下復  
出力振之而詩之正統不墜然東坡賦才也大故解縱  
繩墨之外而用之不窮山谷措意也深故游泳玩味之  
餘而索之益遠大抵同出老杜而自成一家如李廣程  
不識之治軍龍伯高杜季良之行已不可一槩語也近  
世詩家知尊杜矣至學蘇者乃指黃爲強而附黃者亦  
謂蘇爲肆要必識蘇黃之所不爲然後可以涉老杜之

涯涘此簡齋陳公之說云爾予游吳興得之乃知公所  
學如此故能獨步一代頃邑士有欲刻公詩者因出前  
聞爲冠集首庶學者知公淵源所自且以折近世黨同  
伐異之說云公名與義字去非初賦墨梅受知徽考入  
中祕書遂掌帝制後參紹興大政簡齋其自謂也玄默  
敦牂中秋晦齋書

簡齋集原序

詩無論拙惡忌矜持瞻彼日月不在情景入玄彼黍離  
離不分奇聞異事流溢自然要于暢極而止彼訐謨定  
命遠猶辰告雖爲德人深致若論其感發濃至故不如  
昔我往矣楊柳依依之句比之柔腸易斷復何以學問  
著力爲哉詩至晚唐已厭至近年江湖又厭謂雲和易  
如流殆于不可莊語而學問爲無用也荆公妥帖排累  
時出經史然體格如一及黃太史岸然特出新意真欲

盛用萬卷與李杜爭能于一辭一字之頃其極至寡情少思如法家者流余嘗謂晉人語言使一用爲詩皆當掩出古今無他真故也世間用事之妙韓淮陰所謂是在兵法諸君未知者豈可以馬尾而數蟲魚而注哉后山自謂黃出理實勝黃其陳言妙語乃可稱破萬卷者然外枯槁又如息夫人絕世一笑自難惟陳簡齋以后山體用后山望之蒼然而光景明麗肌骨勻稱古稱陶公用兵得法外意以簡齋視陳黃節制亮無不及則后

山視簡齋刻削尚似矜持未盡去也吾執鞭古人豈敢  
云獨爲簡齋放言或問宋詩簡齋至矣畢竟比坡公何  
如曰詩道如花論高品則色不如香論逼真則香不如  
色廬陵須溪劉辰翁序



欽定四庫全書

簡齋集卷一

宋 陳與義 撰

賦

覺心畫山水賦

天寧堂中黃面老禪四海無人碧眼視天有一居士山  
澤之仙結三生之習氣口不俳乎說山聊寄答于一笑  
夜乃夢乎其間重巖複嶺虧蔽吐吞紛應接其未了萬

雲忽兮歸屯亂晦明于俄頃存十二之峯巒有木偃蹇  
樵斤所難飽千霜與百霆根不動而意安澹山椒之落  
日送萬古以無言彼棲鳥其何知方相急而破烟須臾  
變滅所見惟壁有木上座夢中侍側問上座以何見口  
不能于嘖嘖豈彼口之真無悟前境之非實管城子在  
旁代對以臆忽風雨之驟過恍向來之所歷此其畫耶  
則草木禽鳥皆似相識抑猶夢耶則已見囿于筆墨之  
迹矣居士再至問以此故復寄答于一笑持畫疾去



玉延賦

吾聞陽公之田不墾不耕爰播盈斗可獲連城資陰陽  
之淑氣孕天地之至精蜿蜒赤堊之腴煌扈白虹之英  
驚山木之潤發冒朝采之餘榮逮百嘉之澤盡候此玉  
之豐成王公大人方以不貪為寶辭秦玉而陋楚珩雖  
三獻其奚售乃舉贄于老生老生囊中之法未試腹內  
之雷久鳴塞石鼎而自濯搗豕腹之彭亨春江浩其波  
濤遠壑颯以松聲俄白雲之漲谷亂雙眼于晦明擅人

間之三絕色味勝而香清捧盃孟而笑領映牖戶之新  
晴斥去嬾殘之芋盡棄接輿之菁收奇勲于景刻刻未  
落而體輕凌厲八仙掃除三彭見蓬萊之夷路接閭闔  
于初程彼徇華之大夫含三生之宿醒汙之以蜂蜜辱  
之以羊羹合嘗逸少之炙同傳孝儀之鯖歎超然之至  
味乃陸沈于聾盲豈皆能于我遇亦或薌而或烹起援  
筆而三叫驅蛇蚓以縱橫吾何與大夫之迷疾蓋以慰  
此玉之不平也

放魚賦

仲冬良日二客過予請觀魚于竇氏之陂攝衣而興從  
客往嬉日澹寒郊木影陸離顧道旁之湫異于他日浩  
如潮之方滋客曰是殆水師不仁將平地以盡魚空其  
池而寓之斯也至則水不膚寸矣而百萬之鱗灑潑聲  
沸金橫玉偃失據狼狽赤手下捕易若拾塊翻倒窟穴  
不遺細碎問其所以得取則輸金錢以買諸竇氏噫嘻  
是魚之愛其生與我無異也奈何使充物之性命帶險

喁而就轡割纒以易一朝之費彼任公子雖永負于一  
魚而淞河以東蒼梧以北皆歌舞其賜則乘除而逆計  
之其得失有以相濟也聊解我衣救爾戢戢爰得數斗  
護以微濕豈不指動易生相急將逸爾于隋溝資淮海  
以供給已趣湯而幸見赦同伏鑕而偶不及其亦知遇  
我之不可常而教魴鱖以慎出入也僮奴笑曰美則美  
矣抑此賜不終夫巢梁之禽智困深叢草秀巖下出山  
不豐是魚安樂于止水之淵久矣而一旦投之衝沙走

石之流亦鱗敗鱗折未十里而取窮耳不虞生異使我  
辭索遂用其言脫魚再厄步驟門而左轉得渺然之平  
澤其深黛黑其淺鑑白窮源委而四顧知吾輩之責塞  
罄一瀉而莫留亂藻荇之寒碧乍團團以洋洋忽四散  
而莫迹異乾魚之還鄉類羣鱣之徙宅念宇宙之偉事  
或偶成于戲豈特為今日之一快吾將候風雷于他夕  
也衆客欣然三遶而退歸泚我筆以記斯會庶幾竇氏  
子聞之為來歲之戒

銘

研銘

無住菴老居士紫玉池娛晚歲不出菴書誦偈誰使之  
踐朝市入承明司帝制如智井久不治百尺泉來莫冀  
古之人輕百計惟出處不敢易嗟已晚覺非是勒斯銘  
戒後世

書堂石室銘

巍巍仁祖軼堯邁禹揆厥所因中外有人有懷周公聽

明正直推原厥本功在石室仁祖在天公在列星石室  
在茲公實臨之咨爾山鬼護而勿失咨爾裔孫肅茲草  
木後有興者無媿茲石

贊

以玉剛卯爲向伯恭生朝贊

仲冬吉日風穆氣休我出剛卯以壽元侯祝融之玉色  
比離方元侯佩之如玉之剛攘除厲凶以迎明王南門  
不鍵有室則強三肅元侯旣贈旣禱曷其報我當以剛

卯

甘泉吾使君畫史作簡齋居士像居士見之大笑  
如洞山過水覩影時也戲書三十二字

兩眉軒昂厥像如寄而服如此又似離世鑑中壁上處  
處皆是簡齋雖傳文殊無二

記

頤軒記

余客汝州識治獄掾陳德潤與之語肺肝無溪壑也奔



走百僚之底未嘗一日有急容後官太學而其弟道醇  
肄業焉宦學萬里貧不振天子幸學官之澹然不色喜  
余以是媿其兄弟道醇間語曰我又有隱居不仕之兄  
廬西山之下其燕居所勝之曰頤軒前崖岫之峭崿後  
礪壑之琮琤烟雲草木晦明寒暑出天地之奇變以娛  
軒中之人世之得喪利害無所經其懷我與汝州掾心  
不能忘也余面贊之曰鍾皓有兄不仕皓亦逡巡難進  
居官有聞何點棲遁求志而其子弟遺進退之節後世

莫訾焉而今而後知二子之師友不在他在頤軒爾于其歸也申以告之曰大丈夫用世非難也無媿子頤軒之兄爲難也其亦告子頤軒之兄不仕非難也行義風烈有聞于鄉里無媿乎前之山後之澗爲難也古之君子居也其仕也其道一也而已二子方將爲軒冕所縻異日風績振耀而用舍行藏可觀可紀則頤軒之進德亦可占矣道醇曰是蓋頤軒之記盡書之乃錄大略使歸書之其壁且以告德潤云洛陽陳去非記

跋

跋郭節度父墓誌銘

自古將帥之世其功名福祚鮮有克全至漢辛武賢父子始傳世為名將史氏賢之又發于序傳榮華至今本朝郭氏乃有累世之美勲業書于竹帛閱耀于一時至殿帥益顯遂以宿將用也不見其形願察其影其受祉若此則其所行可知矣夫當頌以規者同郡之至情也天下方有難非血誠壯烈不足以解國家憂殿帥勉

之亦以告意氣之同者

簡齋集卷一

欽定四庫全書

簡齋集卷二

宋 陳與義 撰

五言古詩

次韻謝文驥主簿見寄兼示劉宣教

斷蓬隨天風飄蕩去何許  
寒草不自振生死倚牆堵  
兩塗俱寂寞衆手劇雲雨  
坐令習主簿下與雞鶩伍  
遙知竹林交未肯一時數  
翩翩三語掾智與慢相補  
髯劉吾

所畏道屈空去魯子才亦落落傾蓋極許予四變照河

濱一笑寬逆旅堂堂吾景方

張儀據字

去作泉下土未知我

露電能復幾寒暑思寡久未決食齋轉覺苦我不逮諸

子要先諸子去不種楊惲田但灌呂安圃未知誰善釀

可作孔文舉十年亦晚矣請便事斯語

來詩有十年之約

題劉路宣義風月堂

長風將佳月萬里到此堂天遊本無待邂逅今夕涼北  
牕舊竹短南牕新竹長此君本無心風月不相忘道人

方燕坐萬物凝清光不獨挹霜雪似聞笙鶴翔乃知一  
念靜可洗千劫忙明當攜麴生往問安心方

次韻張矩臣迪功見示建除體

建德我故國歸哉遙我驅除道得歡伯荆棘無復餘滿  
懷秋月色未覺飢腸虛平林過西風爲我起笙竽定知  
張公子能共寂寞娛執此以贈君意重貂襜褕破帽與  
青鞋耐久心亦舒危處要進步安處勿停車成虧在道  
德不在功利區收視以爲期間君此何如開尊且復飲

辭費道已迂  
閉口味更長  
香斷牕櫺疎

八韻歌二首

金張與許史不知寒士名  
石交少瑕疵但有一麴生絲  
色隨染異擇交士所貴  
竹林固皆賢山王以官累  
飽酌可延客藜藿無是非  
土思非不深無屋未能歸  
革華雖可侯不敢踐危地  
木奴曾足飽寬作十年計

金章笑鷄衣玉堂陋茅茨  
石火不須臾白駒隙中馳  
絲鬢那可避會當來如期  
竹固不如肉飛觴莫辭速  
匏竹



且勿喧聽我歌此曲土花玩四時未覺有榮辱革木要  
一聲好異乖人情木公不可待且復舉吾觥

次韻張元方春雪

雪黃天爲低牕白雪初作幽人睡方覺簾外舞萬鶴斜  
斜既可人整整亦不惡不知來何暮遂失梅花約東風  
桃杏暖不受珠璣絡聊回萬斛潤點點付藜藿幽人無  
酒飲一笑供酬酢歲晚會復來相期在丘壑

舍弟踰日不和雪勢更密因再賦

密雪來催詩似怪予不作蔽天白漫漫誰辨鷺與鶴坐  
今天回笑未受風作惡急飛旣繁麗緩舞尤綽約稍積  
草木上斷縞莽聯絡終然要白日印彼葵與藿滿眼豐  
歲意空詩信難酢慎勿辭典衣已不慮填壑

雜書示陳國佐胡元茂四首

一官專爲口俯仰汗我顏顧將千日飢換此三歲閒冥  
冥雲表雁時節自往還不憂稻粱絕憂在羅網間絕勝  
杜拾遺一飽常間關晚知儒冠誤猶戀終南山

杜門十日疾因德觀妄身勿云千金軀今視如埃塵平生老赤腳每見生怒嗔揮汗煮我藥見此媿其勤

巨源邦之棟急士如拾珍定知柳下鍛遠勝崔史陳絕交雖已隘益見叔夜真士要輕衣食求仁今得仁釋之與王生盛美俱絕倫吾評竹林詠未可少若人

吾昔同年友壯志各南溟十年風雨過見此落落星秀者吾元茂衆器見鼎錙許身稷契間不但醉六經時逢下車揖慰我兩眼青勿憂事不理伯始在朝廷

書懷示友十首

俗子令我病紛然來座隅賢士貴懷思不受折簡呼城  
東陳孟公久闊今何如明月照天下此夕與君俱不難  
十里勤畏借東家驢似聞有老眼能作薦鶚書功名勿

念我此心已掃除

陳孟公  
謂國佐

張子霜後鷹毛骨非凡曹不肯兄事錢但欲僕命騷胡  
為隨我輩錄錄著青袍相逢車馬邊技癢不得搔

平生詩作崇腸肚困藿食使我忘殷憂亦自得詩力絕

知是餘蔽且復永今日不如付杯酒一笑萬事畢毛穎  
僅升堂麴生真入室

我夢鐘鼎食或作山林遊當此適意時略與人間侔覺  
來跡便掃我已不悲憂人間安可比夢中無悔尤

我策三十六第一當歸田柴門種雜樹婆娑樂餘年是  
中三益友不減二仲賢柏樹解說法桑葉能通禪

有錢可使鬼無錢鬼擲撇百年堂前燕萬事屋上烏微  
官不救飢出處違壯圖相牛豈無經種樹亦有書如何

求二頃歸臥淵明廬曝背對青山鳥鳴人意舒試數門  
前客終歲幾覆車

仲舒老一經策世非所長瓦鼎薦蔬食但取充飢腸偉  
哉賈生書開闔有耿光旣珍亦可飽舉俗不見嘗

揚雄平生學肝腎困雕鎬晚于玄有得始悔賦甘泉使  
雄早大悟亦何事于玄賴有一言善酒箴真可傳

蕭蕭十月菊耿耿照白草開牕逢一笑未覺徐娘老風  
霜要飽經獨立晚更好韓公真躁人顧用擾懷抱

青青堂西竹歲寒不緇磷蓬蒿衆小中拭眼見長身澹  
然冬日影此處極可人子猷幸見過一洗聲色塵

風雨

風雨破秋夕梧葉牕前驚不愁黃落近滿意作秋聲客  
子無定力夢中波撼城覺來俱不見微月照殘更

曼陀羅花

我圓殊不俗翠蕤敷玉房秋風不敢吹謂是天上香烟  
迷金錢夢露醉木蕖妝同時不同調曉月照低昂

與周紹祖分茶

竹影滿幽牕欲出腰髀嬾何以同歲暮共此晴雲枕摩  
挲蟄雷腹自笑計常短異時分白雲小杓勿辭滿

汝州吳學士觀我齋分韻得真字

狂夫縛軒冕自許稷契身靜者樂山林謂是羲皇人不  
如兩忘快內保一色醇偉哉道山傑滯此汝水濱大來  
會闊步小憇得幽欣一齋有琴酒萬事無縉磷不作子  
公書肯受元規塵人言君侯癡我知丈人真月明泉聲



細雨過竹色新是間有真我宴坐方申申

陪諸公登南樓啜新茗家弟出建除體詩諸公既  
和予因次韻

建康九醞羹侑以八味珍除瘴去熱惱與茶不相親滿  
月墮九天紫面光璘璘平生酪奴謗脈脈氣未申定論  
得公詩雅好知凝神執持甘露椀未覺有等倫破睡及四  
座媿我非嘉賓危樓與世隔萬事不及唇成公方坐嘯  
賞此玉花勻收杯未要忙再試晴天雲開口得一笑茲

遊念當頻閉眼歸默存助發梨棗春

諸公和淵明止酒詩因同賦

愛河漂一世既溺不能止不如淡生活吟詩北牕裏肺  
肝亦何罪因此毛錐子不如友麴生是子差可喜三杯  
取徑醉萬緒散莫起奈何劉伶婦苦語見料理不如一  
覺睡浩然忘彼己三十六策中此策信高矣政使江變  
酒誓不涉其渌尚須學王通藝黍供祭祀

周叔易于觀我齋分韻得自字

小草浪出山大隱乃居市功名一畫餅甚矣癡兒計傾  
身犯火宅顧自以為戲汗顏逢冰子更復問奚自三肅  
齋中人本是青雲器雖然山止山政爾吏非吏蕭蕭牕  
前竹見引著勝地世間劇寒暑了不受榮悴門前剥啄  
客欲問觀我意但持邯鄲枕贈客一覺睡

觀我齋再分得下字

一慵縛兩腳閉戶了晨夜夢攀城西樹起造君子舍紫  
髯出堂堂見客披衣謝平生功名手嗜靜如食蕉小齋

劇冰壺中明無外罇要知日用事趺坐看鳥下主人心  
了了竹石亦閒暇兒童慣看客我車當日駕平分齋中  
閒風月不待借要須酒屢費不用牛心炙

寄題商洛宰令狐勵迎翠樓

西來金衣鶴書落汝水湄雲霞映道路中有迎翠詩遙  
知五斗粟未辦買山資政要百尺樓了此浮天眉森然  
詩中畫想見憑闌時朝曦與暮靄百變皆令姿君方領  
此意簿書何急為衆手劇雲雨惟山不瑕疵當年四老

翁視世輕于芝坐令山偃蹇不受人招麾誰歟樓中客  
俯仰與山期顧要君折腰督郵真小兒因之感我意故  
巖歸已遲便攜靈運屐不待德璋移

次韻謝天寧老見貽

庭柏不受寒依然照人綠霧收晨光發可玩不可掬道  
人方出定不復辨羊鹿微雲度遙天一笑立于獨嗟予  
晚聞道學看傳燈錄三生蠹書魚萬卷今可束藪雖已  
破碎猶欲大其輻是身堪底用况乃五斗粟自從識師

面日月幾轉轂受師爐中烟無處著榮辱周妻與何肉  
恨我未免俗從今謝百事請作龜頭縮卻笑長沙傅區  
區問淹速聊將非舌言往和無譜曲

留別心老

老心霜下松名與隆公齊人物北斗南佛事東院西平  
生四海脚不踏四海泥晚說汝州禪飽噉天寧齋夢中  
與我遇相扶兩枯藜每見眼自明不復煩金篦卻從夢  
中別未免意慘悽他時訪生死林深路應迷

九日賞菊

黃花不負秋與秋作光輝夜霜猶作惡朝日為解圍  
今晨豈重九節意入幽菲孤芳擅天地衆卉亦已微殷勤  
黃金鑠照耀白版扉沽酒欲壽花孔兄與我違清坐絕  
省事未覺此計非夕英豈不腴騷人自難肥

遊葆真池上

牆厚不盈咫人間隔蓬萊高柳喚客遊我輩御風來坐  
久日落盡淡淡池光開白雲行水中一笑三徘徊鴨兒

輕歲月不受急景催試作弄萬驚徐去首不迴無心與  
境接偶遇信悠哉再來知何似有句端難裁

端門聽赦詠雪

雲葉垂雞竿雪花眩鸞旗一天豐年意飄入萬壽卮茫  
茫玉妃班影亂千官儀也知樓頭喜舞態方自持教坊  
可憐女面赤婆娑時天公一笑罷未覺風來遲小儒驚  
偉觀倒笏不敢吹歸家得細說平分遺妻兒茅簷玉三  
尺坐玩可樂飢生活太冷淡侑以一篇詩



遊玉仙觀以春風吹到人為韻得吹字

清遊天不借破帽沙疾吹下馬橈桡鳴未恨十里陂風  
餘簷鐸語坐定爐烟遲新春碧瓦麗古意喬木奇黃冠  
見客喜此士定不羈但媿城中塵浼子青松枝人間爭  
奪醜我亦寄枯槁輸贏共一笑馬影催歸時

路歸馬上再賦

偶然思玉仙便到玉仙遊興盡未及郭玉仙失回頭成  
毀俱一念今昔浪百憂未知橫笛子亦解此意不春風

所經過水色如潑油垂鞭看落日世事劇悠悠

簡齋集卷二

欽定四庫全書

簡齋集卷三

宋 陳與義 撰

五言古詩

夏日集葆真池上以綠陰生畫靜賦詩得靜字

清池不受暑幽討起予病長安車轍邊有此荷萬柄是  
身惟可嬾共寄無盡興魚遊水底涼鳥語林間靜談餘  
日亭午樹影一時正清風不負客意重百金贈聊將兩

鬢蓬起照千丈鏡微波喜搖人小立待其定梁玉今何  
許柳色幾衰盛人生行樂耳詩律已其賸邂逅一樽酒  
他年五君詠重期踏月來夜半嘯烟艇

遊慧林寺以三峽炎蒸定有無為韻得定字是日  
欲逃暑閣下而守閣童子持不可

我如東郊馬軟側甘瘦病今晨舉足輕起行得幽勝撫  
牕喚嬾融槁面初出定眼明無常物坐久爐烟正門前  
幾烏帽往來送朝暝豈知帽影邊有地白日靜寶閣陰

肅肅童子色不令年來惜違人一笑取歸逕願言捐何  
肉終歲奉清淨簷鐸豈印吾出門有餘聽

登天清寺塔

為眼不計腳攀梯受微辛半天拍闌干驚倒地上人風  
從萬里來老夫方岸巾荒荒春浮木浩浩空納塵夕陽  
差萬瓦赤鯉欲動鱗須臾暮烟合青魴映齋淪萬化本  
日馳高處覺眼新借問龕中仙坐穩今幾晨俗子書滿  
壁澹然不生嗔惟有太行山修供獨殷勤

浴室觀雨以催詩走羣龍為韻得走字

微雲生屋脊  
欹枕看培塿  
崔嵬亂一瞬  
泰華入搔首  
須臾萬銀竹  
壯觀驚戶牖  
推擊竟自碎  
映空白烟走  
餘飄送未了  
日色在井口  
去冬三寸雪  
寒日澹相守  
商量細細融  
未覺經旬久  
誰能料天公  
辦此脫穎手  
一涼滿天地  
平分到庭柳  
繁端嘯餘風  
送我一杯酒  
畫屏題細字  
盡記同來友  
俗眼之所遺  
此事當不朽

夏至日與太學同舍會葆真二首

微官有閤閱三賦池上詩林密知夏深仰看天離離官  
忙負遠興觴至及良時荷氣夜來雨百鳥清晝遲微風  
不動蘋坐看水色移門前爭奪場取歡不償悲欲歸未  
得去日暮多黃鸝

明波影千柳紺屋朝萬荷物新感節移意庭覺景多遊  
魚聚亭影鏡面散微渦江湖豈在遠所欠雨一蓑忽看  
帶箭禽三歎無奈何

夏日

赤日可中庭樹影劍不開燭龍未肯忙一步九徘徊夢  
中驚耳鳴忽覺聞遠雷屋上奇峯起欹枕看雲來變化  
信難料轉頭失崔嵬雖然不成雨風起亦快哉槐葉萬  
背白少振十日埃白團豈辦此擲去羞薄才蜻蜓泊牆  
陰近人故多猜牆西豈更熱已去復飛迴

試院春晴

今日天氣佳忽思賦新詩春光挾晴色併上桃花枝白  
雲浩浩去天色青陸離餘霏遇晚日彩翠紛新奇天公



出變化驚倒癡絕兒逶迤或耐久美好固暫時平生一枝筇穩處念力衰淡然意已足卻赴青燈期

寄題兗州孫大夫絕塵亭二首

不讀遠遊賦放懷茲地宜雲山繞牕戶萬態爭紛披世故日已遠風水方逶迤倚杖夜來雨東山烟散遲人間許長史不與此心期

境空納浩蕩日暮生沈寥竹聲池邊起欲斷還蕭蕭文人方微吟萬象各動搖林間光景異月出東山椒門前

誰剥啄已逝不須邀

休日早起

朧朧牕影來稍稍禽聲集開門知有雨老樹半身濕劇  
讀了無味遠遊非所急蒲團著身寬安取萬戶邑開鏡  
白雲度捲簾秋光入飽受今日閒明朝復羈縻

夏夜

幽牕報夕霽微月在屋椽手中白羽扇共此夜寥寥六  
月天正碧三更樹微搖緬懷山中景茲夕感路遙長嘯

送行雲可望不可招夜闌林光發白露濡青條

與伯順飯于文緯大光出宋漢傑畫秋山

焚香消午睡開畫逢秋山皇都馬聲中有此四士閒離  
離南國樹閃閃湘水灣悠悠孤鳥去淡淡晨暉還履上  
十年蠟未散腰腳頑不如一詩君坐此巖石間遠峯如  
脩眉近峯如墮鬟書生飽作崇眼亂紛爛斑一笑遺世  
人聊破千載顏詩成即畫記可益不可刪

冬至二首

少年多意氣老去一分無閉戶了冬至日長添數珠北  
風不待節鴻雁天南驅烏帽獨何幸七日守屋廬石爐  
深炷火撩亂一榻書只可自怡悅不堪寄張扶

人生本是客杜叟顧未知今年我聞道悲樂兩脫遺日  
色如昨日未覺墉陰遲不須行年記異代尋吾詩東家  
窈窕娘融蠟幻梅枝但恐負時節那知有愁時

將赴陳畱寄心老

今日忽不樂圖書從糾紛不見汝州師但見西來雲長

安豈無樹憶師堂前柳世路九折多遊子百事醜三年  
成一夢夢破說夢中來時西門雨去日東門風書到及  
師閒為我點枯筆畫作謫官圖羸驂帶寒日他日取歸  
路千里作一程飽喫殘年飯就師聽竹聲

赴陳留

草草一夢闌行止本難期歲晚陳留路老馬三振鬣自  
看鞭袖影曠野日落遲柳林行不盡想見行春時點點  
羊散村陣陣鴻投陂城中那有此觴處皆新詩舉手謝

路人醉語勿瑕疵我行有官事去作三年癡遙聞辟穀  
仙閱世河水湄時從玩木影政爾不憂飢

種竹

種竹不必高搖綠當我楹向來三家墅無此笙簫聲皇  
天有老眼為閱十日晴護我蕭蕭碧偉事鄰翁驚同休偶  
落此相向意甚平何須俟迷日可笑世俗情明年萬天  
矯穿地聽雷鳴但恨種竹人南山合歸耕他時夢中路  
留眼記所更蒼雲屯千里不見陳畱城

再遊八關

古鎮易爲客了身一藍輿貪遊八關寺忘卻子公書青  
青天氣肅淡淡春意初東風經古池滿面生絃餘卯申  
縛壯士人世信少娛時來照茲水檢點鬢與鬚日暮登  
古原微白見遠墟念我遂初賦徘徊月生裾悠悠不同  
抱悄悄就歸途

食筍

竹君家多才楚楚皆席珍成行著錦袍玉色映市人惠

然集吾宇老眼簷光新麴生亦稅駕共慰藜藿貧不待  
月與影三人宛相親可憐管城子頭禿事苦辛按譜雖  
同宗聞道隔幾座詩成聊便寫一笑驚比鄰

初夏遊八關寺

閉門睡過春出門綠滿城八關池上柳絮罷但藏鶯世  
故劇千蛸今朝此閒行草木隨時好客恨終難平寺有  
石壁勝詩無康樂聲扶輦不得上新月水中生

題酒務壁



野馬本不羈無奈卯與申當時彭澤令定是英雄人客  
來兩繩牀客去一欠伸市聲自雜沓爐烟自輪囷鶯聲  
時節改杏葉雨氣新佳句忽墮前追摹已難真自題西  
軒壁不雜徐庾塵

秋夜詠月

庭樹日日疎稍覺夜月添推愁了此段捲我三間簾黃  
花牆陰遠白髮露氣嚴平生六尺影隨我送涼炎踏破  
千憂地投老乃自嫌尚想采石江宮錦映霜蟾夜半賦

詩成起舞魚龍兼辦此詎難事取快端宜廉

入城

竹輿聲咿啞路轉登古原孟冬郊澤曠細水鳴蘆根霧  
收浮屠立天闊鴻雁奔平生厭喧鬧快意三家村思生  
長林內故園歸不存欲為唐衢哭聲出且復吞

夜步隄上三首

世故生白髮意行無與期平生木上座臨老始相知月  
中沙岸永歲暮河流遲留侯廟前柳葉盡空離離百年

信難料勝賦奇絕詩

人間睡聲起幽子方獨立倚杖看白雲亭亭水中度十  
月雁背高三更河流去物生各擾擾念此煎百慮聊將  
憂世心數徧橋西樹

旋買青芒鞋去踏沙頭月爭教冠蓋地著此影突兀樹  
寒棲鳥動風轉孤管發月色夜夜佳人生事如髮夢中  
續清遊濃露濕銀闕

早起

竟夜聞落木雨歇牕如新披衣有忙事簷前看歸雲初  
陽上林端鴉背明紛紛我亦迫經課日計在一晨再燒  
結願香消洗三生勤羣公持世故白髮到幽人幸不識  
奇字門絕車馬塵誰能共此牕竹影可與分

晚步

手把古人書閒讀下廣庭荒村無車馬日落雙檜青曠  
然神慮靜濁俗非所寧逍遙出荆扉竚立瞻郊坰須臾  
暮色至野水皆晶熒卻步面空林遠意更杳冥停雲甚

可愛重疊如沙汀

同楊運幹黃秀才村西買山藥

潦縮田路寬委蛇散腰腳勝日一枝杖村西買山藥岡  
巒相吞吐遠木互前卻天陰野水明歲暮竹籬薄田翁  
領客意發筐堆磊落玉質細色裘用世乃見縛屠門幾  
許快夜語尋幽約石鼎看雲翻門前北風惡

早起

曉寒生木枕牕白夢難續自起開柴扉空庭立喬木濛

濛井氣上淡淡天容肅塵心忽昭曠何異居澗谷學道  
審不逢忍飢差已熟皇天賜豐年菜本如白玉一簡了  
百事狡獪嗤顏歎幽鳥行屋山悠然寄吾目

八關僧房遇雨

脫履坐明牕偶至情更適池上風忽來斜雨滿高壁深  
松含歲暮幽鳥立晝寂世故方未闌焚香破今夕

次舞陽

客子寒亦行正月固多陰馬頭東風起綠色日夜深大

道不敢驅山徑費推尋丈夫不逢此何以知嶮嶮行投  
舞陽縣薄暮森衆林古城何年缺跋馬看日沈憂世力  
不逮有淚盈衣襟嗟我西北雲想像折寸心

次南陽

今日東北雲景氣何佳哉我馬且勿驅當有吉語來春  
寒欺客子滿意旗亭杯百年耳頻熱萬事首不迴臥龍  
今何之有冢今半摧空餘喬木地薄暮鴉徘徊懷古視  
落日媿我非長才卻憑破鞍去風林生七哀

海棠

春雨夜有聲連林杏花落海棠已復動寒食豈寂寥人  
間有此麗赴我隔年約花葉兩分明春陰耿簾幕東風  
吹不斷日暮胭脂薄何可無我吟三叫恨詩惡

雨中觀秉仲家月桂

月桂花上雨春歸一憑闌東西南北客更得幾時看紅  
衿映玉色薄暮無乃寒園中如許樹獨覺賦詩難

簡齋集卷三



欽定四庫全書

簡齋集卷四

宋 陳與義 撰

五言古詩

題簡齋

我牕三尺餘可以閱晦明北省雖巨麗無此風竹聲不  
著散花女而況使鬼兄世間多岐路居士繩牀平未知  
阮遙集幾屐了平生領軍一屋鞋千載笑絕纓槐陰自

入戶知我喜新晴  
覓句方未了  
簡齋真虛名

印老索鈍菴詩

人言融公嬾牀上  
揖賓客我來兩忘揖  
團團一菴白戲談  
鄧州禪分食天寧  
麥竹風亦喜我蕭  
索至日夕出家  
丈夫事軒冕本兒  
劇願香驚餘烟世  
故感陳迹固應師  
未鈍使我不安席  
時求一滴水爲洗  
三生石

登城樓

去年夢陳留  
今年夢鄧州  
幾夢即了我  
一笑城西樓  
新

晴草木麗落日淡欲收遠川如動搖景氣明田疇百年  
幾憑闌亦有似我不城陰坐來失白水光不流丈夫貴  
快意少住寬千憂歸嫌簡齋陋局促生白頭

遊董園

西園可散髮何必賦遠遊地曠多雄風葉聲無時休幸  
有濟勝具枯藜支白頭平生會心處未覺身淹留散坐  
青石牀松意淡欲秋薄雨青衆卉深林耿微流一涼天  
地德物我俱夷猶東北方用武六月事戈矛甲裳無乃

重腐儒故多憂珍禽叫高樹且復寄悠悠

夏雨

三伏過幾日坐數令人癡片雲忽西行庭樹生光景須  
臾萬銀竹壯觀發異境天公終老手一笑破日永龍公  
勿憚煩事了亦俄頃脩竹恬變化依然半牕影

積雨喜晴

積雨得一晴開牕送吾目疊雲帶餘憤遠樹增新綠天  
公信難料變化雜神速夕霞盡意紅詰朝固難卜西軒

一杯酒未負將軍腹竹林懷微風餘韻久回復熱官豈  
辦此何必思爛熟曳杖出門行棲鴉息枯木

北征

世故信有力挽我復北馳獨銜七月暑行此無盡陂百  
卉共山澤各自有四時華實相後先盛過當同衰亦復  
觀我生白髮忽及期夕雲已不征客子今何之願傳飛  
仙術一洗局促悲披襟閭風觀濯髮扶桑池

晚發葉城

竹輿開雨牖秋色為橫分左送廉纖月右揖離披雲詩  
情滿行色何地著世紛欲語王縣令三斗不能聞

美哉亭

西出成臯關土俗僅容駝天挂一匹練雙崖闔嵯峨忽  
然五丈關亭構如危窠青山麗中原白日照大河下視  
萬里川草木何其多臨高一吐氣卻奈雄風何辛苦生  
一快造化巧揣摩險易終不償翻身下殘坡

山路曉行

兩崖夾曉月萬壑分秋風今朝定何朝孤賞莫與同石  
路抱巖轉雲氣青濛濛籃輿扶露枝亂點驚僕童微泉  
不知處玉佩鳴深叢平生慕李愿得此行旅中居人輕  
佳境過客意無窮山木好題詩恨我行怱怱

題董宗禹園先志亭宗禹之父早失母萬方求得  
之此其晚節色養之地也

作客古南陽問俗仁孝敦坐讀杜羔傳起訪城西園偉  
哉是家事作傳堪千言當年懷橘處華屋淡曉暎大松

蔭後楹小松羅前軒風露所沐浴千載當連根我已廢  
蓼莪感茲淚河翻葉聲含三歎送我出園門

題崇山

短篷如兔驚載我萬斛愁試登山上亭卻望沙際舟世  
故莽相急長江去悠悠西南浸山影晦明分中流蕩漾  
寶鑑面翠髻千螺浮去程雖云阻茲地固堪留客路惜  
勝日臨風搔白頭衆色忽已晚川光抱巖幽三老呼不  
至我興方未收下山事復多題詩記曾遊



與季申信道自光化復入鄧州書事四首

孫子白木杖富子黑油笠我獨白竹籃差池復相及夕  
陽橋邊畫岸幘歸雲急勿語城中人從渠慎出入

賣舟作歸計竹輿穩如舟霧收青傘濕行路當春遊老  
馬不自知意欲踏九州依然還故樞寂寞壯心休

再來生白髮重見鄧州春依舊城西路桃花不記人卜  
居得窮巷日色滿牕新微吟驚市卒獨鶴語城闌

城西望城南十日九相隔何如三枝杖共踏江上石門

前流水過春意滿渠碧遙知千頃江如今好顏色

述懷

閉戶生白髮逍遙步城隅野外晴林滿天末暮雲孤水  
容淡春歸草色帶雨濡物態紛如昨世事再嗚呼京洛  
了在眼山川一何迂乘槎莽未辨且復小踟蹰

寄題趙景溫筠居軒

相逢漢江邊盜起方如雲當時蒼黃意亦可無此君俗  
士固鮮觀王孫終逸羣清秋不可負牖壁看脩筠碧幹

立疎雨叢梢冒斜曛引君著勝地世事從糾紛何時微  
月夕胡牀與予分高吟呼天風夜半笙簫聞

夢中送僧覺而忘第三聯戲足之

兩鴻同一天羽翼不相及偶然一識面別意已超忽去  
程秋光好萬里無斷絕雖無仁人言贈子以明月

正月十二日自房州遇金兵至奔入南山十五日

抵回谷張家

久謂事當爾豈意身及之避兵連三年行半天四維我

非洛豪士不畏窮谷飢但恨平生意輕了少陵詩今年  
奔戶州驢馬背後馳造物亦惡劇脫命真臺麓南山四  
程雲布韞傲險巖籬間老炙背無意管安危知我是朝  
士亦復顰其眉呼酒軟客腳菜本濯玉肌窮途士易德  
歡喜不復辭向來貪讀書門戶生白髭豈知九州內有  
山如此奇自寬實不情老人亦解頤投宿恍世外青燈  
耿茅茨夜半不能眠澗水鳴聲悲

十七夜詠月

月輪隱東峯奇彩在南嶺北崖草木多蒼茫映光景玉  
盤忽微露銀浪瀉千頃巖谷散陸離萬象雜形影不辭  
三更露冒此白髮頂老筇無前遊危處有新警澗光如  
翻鶴變態發遙境回首房州城山中夜何永

獨立

籬門一徙倚今夜天星繁獨立人世外惟聞澗水喧叢  
薄凝露氣羣峯帶春昏偷生亦聊爾難與衆人言

與信道遊澗邊

斜陽照亂石巔崖下雙筇試從絕壑底仰視最奇峯迴  
碕發澗怒高靄生樹容半巖菖蒲根翠葆森伏龍豈無  
避世士于此尚相逢客心忽悄愴歸路迷行蹤

詠西嶺梅花

雨後衆崖碧白處紛寒梅遙遙仰客意欲下山坡來窮  
谷受春晚邂逅今日開絳領承玉面臨風一低回折歸  
無可贈孤賞心悠哉

遊東巖

散策東巖路夢中曾記經斜暉射殘雪崖谷徧晶熒鴉  
鳴山寂寂意迴川冥冥乘興欲窮討會心還小停新晴  
遠村白薄暮羣峯青危途通仙境勝日行畫屏豈獨淨  
一念將期朝百靈不同南澗詠悲慨滿中局

雨晴徐步

百年幾晴朝徐步山徑濕忽悟春已深鳴禽飛相及雪  
消衆綠淨霧罷羣峯立澗邊千堪巖今日何復集

同信道晚登古原

幽懷忽牢落起望登古原微吹度脩竹半林白翻翻日  
暮紛物態山空銷客魂惜無一樽酒與子醉中言

寒食

竹籬寒食節微雨淡春意諠譁少所便寂寞今有味空  
山花動搖亂石水經緯倚杖忽已晚人生本何冀

出山宿向翁家

紙坊山絕頂直下夕陽斜卻看來處路南北兩巖花田  
翁邀客宿笑指林下家問我出山意無乃貴諠譁



出山道中

雨歇淡春曉，雲氣山腰流。  
高崖落絳葉，恍如人世秋。  
避地時忽忽，出山意悠悠。  
溪急竹影動，谷虛禽響幽。  
同行得快士，勝處頻淹留。  
乘除了身世，未恨落房州。

詠青溪石壁

青溪宜曉日，曲處千丈晦。  
天開蒼石屏，影落西村外。  
虛無元氣立，明滅河漢對。  
人行崢嶸下，鳥急浩蕩內。  
向來千萬峯，瑣細等蓬塊。  
老夫倚杖久，三歎造化大。  
惜哉太

史公意短遺此快更欲訪野人窮探視其背

均陽官舍有安榴數株著花絕稀更增妍麗

庭際安榴樹花稀更可憐青旌擁絳節伴我作神仙日  
遲景不暮微陰眩彌鮮一尊兼百慮心賞更悠然

同左通老用陶潛還舊居韻

故園無非路今已不念歸秋入漢水白葉脫行人悲東  
西與南北欲往還覺非勿云去年事兵火偶脫遺可憐  
鈴鐸影殘歲聊相依天涯一尊酒細酌君勿催持觴望

江山路永悲身衰百感醉中起清淚對君揮

同通老用淵明獨酌韻

紛紛吏民散遺我以兀然悄悄今夕意駒影馳隙間向  
來房州谷採藥危得仙忽駕太守車出處寧非天何妨  
暫閱世謀行要當先西齋一壺酒微雨新秋還蛛網閃  
明晦葉聲錢歲年呼兒具紙筆錄我醉中言

均陽舟中夜賦

遊子不能寐船頭語輕波開牕望兩津烟樹何其多晴江

涵萬象夜半光蕩摩客愁彌世路秋氣入天河汝洛塵  
未消幾人不負戈長吟宇宙內激烈悲蹉跎

石城夜賦

初月光滿江斷處知急流沈沈石城夜漠漠河漢秋為  
客寐常晚臨風意難收三更柝樓底身世入搔頭

晚步湖邊

客間無勝日世故可暫逃杖藜迎落照寒彩徧平皋夕  
湖光景麗晴鶴聲音豪天長簾葭響水落城堞高萬象

各搖動慰此老不遭楚累徑行地處處餘離騷幸無大  
夫貴得伴諸子遨終然動懷抱白髮風中搔

曉登燕公樓

闌干納清曉拄杖追黃鵠燕公不相待使我立于獨霧  
收天落川日動春浮木舉手謝時人微風吹野服

寒食日遊百花亭

晴氣已復濁虛館可淹留微花耿寒食始覺在他州自  
聞鼙鼓聒不恨歲月流亂代有今日茲園況堪遊雲移

樹影失風定川華收曳杖新城下日暮禽語幽羣行意  
易分獨賞興難周永嘯以自暢片月生城頭



簡齋集卷四

欽定四庫全書

集部

簡齋集卷八

五至

詳校官庶吉士<sub>臣</sub>翁樹培

侍讀<sub>臣</sub>孫球覆勘

總校官編修<sub>臣</sub>王燕緒

校對官中書<sub>臣</sub>石鴻緒

謄錄監生<sub>臣</sub>戈廷模

謄錄監生<sub>臣</sub>包文訓

欽定四庫全書

簡齋集卷五

宋

陳與義 撰

五言古詩

王應仲欲附張恭甫舟過湖南久不決今日忽聞  
遂登舟作詩送之并簡恭甫

我身如孤雲隨風墮湖邊牆東水陰好初識避世賢從  
來有名士不用無名錢披君三徑草分我一味禪胡爲



黃鵠舉忽上湖南船竟隨文若去聊伴元禮仙洞庭烟  
發渚瀟湘雨鳴川三老好看客天高柁樓前子魚獨留  
滯坐送管邨遷作詩相棹謳寄恨餘酸然

過君山不獲登覽

我夢君山好萬里來南州青眉橫玉鏡色照城中樓勝  
日空倚眺經年未成遊今朝過山下賊急不敢留嵌空  
浪吞吐蒼蔚風颼颼龍吟雜虎嘯九夏舍三秋了與遙  
賞異況乃行巖幽虺蜉何當掃延佇回我舟擲去九節

筇褰裳走林丘會逢湘君降翠氣衣上浮山椒望蒼梧  
寄恨舒冥搜

泊宋田遇厲風作

逐隊避狂寇湖中可盤嬉泊舟宋田港俯仰看雲移造  
物猶不惜顛風忽橫吹洞庭何其大浪挾雲車馳可憐  
岸上竹翻倒不自持老夫元耐事淹速本無期會有大  
風定見汝亭亭時五月念貂裘竟生薄暮悲蕭蕭不自  
暢耿耿獨題詩

二十二日自北沙移舟作是日聞賊革面

宛宛轉湖灘遙遙隔城邑是時雨初霽衆綠帶微濕曉  
澤澹不波菰蒲覺風入我生莽未定世故紛相襲覲然  
賀蘭面安視一座泣豈知虎與狼義感功反集堯俗可  
盡封嗚呼吾何及氣蘇巨浸內未恨乏供給日歷會有  
窮吾行豈須急近樹背人去遠樹久凝立聊以憂世心  
寄茲忘快悒

舟抵華容縣

篙舟入華容白水繞城堞夾津列茂樹倒影青相接遠  
色分村塢微涼動蘆葉天地困腐儒江湖託孤楫

夜賦

泊舟華容縣湖水終夜明淒然不能寐左右菰蒲聲窮  
途事多違勝處亦心驚三更螢火鬧萬里天河橫阿瞞  
狼狽地山澤空崢嶸弱強與興衰今古莽難平腐儒憂  
平世況復值甲兵終然無寸策白髮滿頭生

月夜

獨立夜轆轤蘆聲泛遙津月下風起波莽莽白龍鱗陰  
彩凝草木暑氣森星辰天地塵未消江湖氣聊伸人生  
幾今夕亂代偶此身胡爲不少樂況乃迹易陳三更大  
魚舞悄愴驚心神永懷騎鯨士發興烟中新

晚晴

幽臥不知晴檣梢見斜日披衣起四望天際山爭出光  
輝渚蒲淨意氣沙鷗逃避盜半九圍兩腳不遺力川陵  
各異態艱險常一律胡爲作弧矢前聖意莫詰豈知百

代後反使姦宄密腐儒徒嗟歎救弊知無術人生如歸  
雲空行雜徐疾薄暮俱到山各不見蹤跡念此百年內  
可復受憂戚林木方翳然放懷陶茲夕

寥落

寥落洞庭野微風泛客裾袁宏詠史罷孫登清嘯餘月  
明流水去夜靜芙蓉舒城郭方多事野興一蕭疎

自五月二日避寇轉徙湖中復徙華容道烏沙還  
郡七月十六日夜半出小江口宿焉徙倚柁樓書

事十二句

回環三百里行盡力都窮巴丘左移右章華西轉東江  
聲搖斗柄秋色彌葭叢羣木立江上芙蓉披月中鏡湖  
應足比剡溪那可同世將非識事孤嘯聊延風

九月八日登高作重九奇父賦三十韻與義拾餘  
意亦賦十二韻

九日風景好節意滿天涯書生尊所聞登高亂城鴉雖  
無後乘麗前驅載黃花兩樓壓波壯衆澤分天斜居夷

驚有苗訪古悲章華蕭條湖海事勝日一笑譁興移三  
里亭木影雜蛟蛇二十醉藜杖兩禪風袈裟奇哉古無  
有未覺欠孟嘉天公亦喜我催詩出微霞賦罷迹已陳  
憂樂如轉車卻後五百歲遠俗增雄誇

粹翁用奇父韻賦九日與義同賦兼呈奇父

安穩輕節序艱難惜光娛先生守首肯朝士誇茱萸前  
年鄧州城風雨傾客居何嘗疎麴生麴生自我疎豈無  
登高地送目與雲俱門生及兒子勸我升籃輿出門復



入門戈旆填街衢去年郢州岸孤楫對壞郭莫招大夫  
魂誰攬使君鬚獨題懷古句枯硯生明珠亦復躋荒戍  
日暮野踟躕白衣終不至眇眇空愁予今年洞庭上九  
折餘崎嶇時憑岳陽樓山川看紫紆孫兄語蟬連王丈  
色敷腴不用踏筵舞秋風搖菊株樂哉未曾有是夢其  
非歟丈夫各堂堂坐受世故驅會須明年節醉倒還相  
扶此花期復對勿令墮空虛明日風景佳南翔先一鳧  
何言知幾早政爾因鱸魚分襟肝肺熱撫事歲月迂歸

家問瓶錫生理何必餘相期衡山南追步凌忽區回首  
望堯雲中原莽榛蕪臣豈專愛死有懷竟不舒老謀與  
壯士二者慙俱無

九日自巴丘適湖南別粹翁

離合不可常去住兩無策渺渺孤飛雁嚴霜欺羽翼使  
君南道主終歲好看客江湖尊前深日月夢中疾世事  
不相貸秋風撼瓶錫南雲本同征變化知無極四年孤  
臣淚萬里遊子色臨別不得言清愁漲胸臆

留別天寧永慶乾明金鑾四老

我生能幾何兩腳疲世故忽破巴丘夢還尋邵陽路窮  
鄉得四老足以慰遲暮勝事遠公蓮深心嬾殘芋本是  
羣山雲暫聚當別去那知天風便不得還相聚凡情我  
未免臨別吐幽句慎勿過虎溪曉霜侵杖屨

別岳州

朝食三斗葱暮飲三斗醋寧受此酸辛莫行歲晚路丈  
夫少壯日忍窮不自恕乘除冀晚泰乃復遭變故經年

岳陽樓不見南宮樹辭巢已萬里兩腳未遑住水落君  
山高洞庭秋已素浮雲易歸岫遠客難回顧飄然一瓶  
錫不知所挂處寂寞短歌行蕭條遠遊賦學道始恨晚  
爲儒孰非腐乾坤杳茫茫三歎出門去

遊道林岳麓

耿耿衡山麓翠氣橫古今濟勝得短筇未怕山行深路  
盤天開闔風動龍噫吟峯巒慘淡處照以布地金世尊  
諸天上燕坐朝千林向來修何行不受安危侵道人輕

殊勝來客費幽尋恍然結願香未會三生心  
山中日易晚坐失羣木陰勿唾此山地後日重窺臨

跋大光所藏任才仲畫二首

遠遊吾不恨扁舟載幅巾  
山色暮暮改林氣朝朝新  
野客初逢句薄暮欲生春  
因知子任子胸懷非世人  
前年與孫子共作南山客  
扶疎月下樹偃蹇澗邊石  
賦詩題古蘚三叫風脫幘  
任子不同遊毫端有疇昔

別大光

堂堂一年長渺渺三秋闊恍然衡山前相遇各白髮歲  
窮牕欲霰人老情難竭君有杯中物我有肝肺熱飲盡  
不能起交深忘事拙乾坤日多虞遊子屢驚骨衡陽非  
不遙雁意猶超忽一生能幾回百計易相奪滔滔江受  
風耿耿客孤發他夕懷君子巖間望明月

舟泛邵江

老去作新夢邵江非舊聞灘前羣鷺起柁尾川華分落  
花棲客鬢孤舟遡歸雲快然心自足不獨避囂紛

江行晚興

曾聽石樓水今過邵州灘一笑供舟子五年行路難雲  
間落日淡山下東風寒烟嶺叢花照夕灣羣鷺盤生身  
後聖哲隨俗了悲歡淹旅非吾病悠悠良足歎

今夕

今夕定何夕對此山蒼然偷生經五載幽意獨已堅微  
陰拱衆木靜夜聞孤泉惟應寂寞事可以送餘年

暝色

殘輝度平野列岫圍青春柴門一枝筇日暮棲心神暝  
色著川嶺高低鬱輪囷水光忽到樹山勢欲傍人萬化  
元相孚幽子意自新肅肅夜將久空明動邊垠田鶴吟  
相應我獨無荒鄰短篇不可就所寄聊一伸

貞牟書事

留侯辟穀年漢鼎無餘功子真策不售脫迹市門中神  
仙非異人由來本英雄撫世獨餘事用舍何必同眷茲  
貞牟野息駕吾其終蒼山雨中高綠草溪上豐仲春水



木麗禽鳴清晝風禍福兩合繩既解一身空榮華信非  
貴寂寞亦非窮

入城

舴艋沂溪來款段踏山去入城緣底事要識崎嶇路稻  
塍白縱橫茅嶺青盤互牧兒歌不休孤客自多懼士行  
猶運甓文公亦習步我敢忘艱難衝烟問荒渡

曳杖

柳條一何長我髮一何短餘日會有幾經春卧荒曠曳

杖陂西去悠然寄蕭散田隴粲高低白水一時滿農夫  
暮猶作媿我讀書嬾且復棄今茲前峯青巉巖

開壁置牕命曰遠軒

鍾妖鳴吾旁楊獠舞吾側東西俱有礙羣盜何時息丈  
夫堂堂軀坐受世逼迫仙人千仞岡下視笑予厄誰能  
久鬱鬱持斧破南壁牕開三尺明空納萬里碧巖霏雜  
川靄竒變供几席誰見老書生軒中岸玄憤蕩漾浮世  
裏超遙送茲夕倚楹發孤嘯呼月出荒澤天公亦粲然

林壑受珠璧會有鶴賀賓經過來見客

再賦

清曉坐南軒望山頭屢側居士亦豈癡飛雲方未息樂  
哉此遠俗亂世免怵迫那知百戰禍豈識三空厄閉門  
美熟睡開門瞻翠壁遠客謝主人分此一牕碧新晴鳥  
鳴簷微暑風入席蕭然此白首豈更冒朝幘誓將老茲  
地不復數晨夕但恨食無肉臞仙出山澤蟄雷轉空腸  
吐句作圭璧一笑示鄰家向來無此客

又賦

我昨在衡山傷心衢路側豈知得此地一坐數千息易  
安生痛定過美出飢迫誓言如齊侯常戒在莒厄要將  
萬里身獨面九年壁如何不已那開牕玩霏碧招呼面  
前山浮翠落衾席一笑等兒戲都忘雪侵幘人生何不  
娛今夕定何夕向來萬頃胸餘地吞七澤念此亦細事  
未遽瑕生璧聊使山中人永記山下客

山齋二首

夏郊綠已徧山齋晝自遲雲物忽分散餘碧暮遠迤寒暑送萬古榮枯各一時世紛幸莫及我塵得常持

雖媿荷鋤叟朝來亦不閒自翦牆角樹盡納溪西山經行天下半送老北牕間日暮烟生嶺離離飛鳥還

六月六日夜

蘊隆豈不壤涼氣亦徐還獨立清夜半疎星蒼檜間晦明莽相代天地本長閒四顧何寥落微風時動關

六月十七日夜寄邢子友

暑雨雖不足涼風還有餘  
樂此城陰夜何殊山崦居  
月明蒼檜立露下芭蕉舒  
試問澄虛閣今夕復焉如

簡齋集卷五

欽定四庫全書

簡齋集卷六

宋 陳與義 撰

五言古詩

遊秦巖

秦巖昧舊聞勝會非復常異哉五里祕發此一日狂籌  
燈破大陰拄杖入仙鄉散途楊梅實承磴菌菰房石液  
白瑤墮泉氣青霓翔度危心欲動逢衍興未央眩人黜



谷深履我翠極長降登窮田壠開闔到鞠場龍遮側岸  
路貓護高廩藏力士倒履空應真儼成行碾缺神所吝  
帳空仙莫量水鳴沱寥內鳥集森羅翳語聞受遠響力  
極生微陽夢中出小竇立處忽大荒塵緣信深重仙事  
豈渺茫靈武唐業開湘濱耀文章望夷秦政壞嶺底畏  
禍殃隱顯非士意安危存國綱且復置此事更將適何  
方賦詩意未愜吾欲棲僧廊

登海山樓

萬航如鳧鷖一水如虛空此地接元氣壓以樓觀雄我  
來自中州登臨眩沖融白波動南極蒼鬢承東風人間  
路浩浩海上春濛濛遠遊爲兩眸豈惜勞我躬仙人欲  
吾語薄暮山蔥蘢海清無蜃氣彼固蓬萊宮

題長樂亭

遠山雲迷巔近山淨如沐客子曳竹輿咿啞過山麓我  
行一何遲時序一何速東風所經過林水一時綠疎雨  
忽飛墜聲在道邊木淑氣自遠歸光景變川陸遙知存

存子明亦戒征軸霽色雖宜詩不見此清穆

題長岡亭呈德升大光

久客不忘歸如頭垢思沐身行江海濱夢繞嵩山麓馬  
何預得失鵬何了淹速匣中三尺冰瘴雨生新綠胡爲  
古驛中坐聽風吟木旣非還吳張亦異赴洛陸兩公茂  
名實自是宜鼎軸發發不可遲帝言頻郁穆

甘棠驛懷李德升席大光

破驛難竝休差池便薪水山川會心地還思對君子道

邊千尺榕午蔭清且美極知非世用我愛不能已東風  
吹南服莽莽綠萬里此地亦可耕胡爲爾予趾

題大龍湫

曉行蒼壁中窮處乃高崖白龍三百丈欲下層巔來映  
日洒飛雨繞山行怒雷潭影納浩蕩雲氣扶崔嵬小儒  
歎造化辨此何雄哉亦知天下絕尊者所徘徊三生清  
淨願俗緣故難開踐勝吾豈敢稽首儻興哀

喜雨

秦望山頭雲昨日鸞鳳舉冥冥萬里風淅淅三更雨小  
臣知君憂起坐聽簷語風力有去來龍工雜文武燈花  
識我意一笑相媚嫵泥翻早朝路瀾瀾光欲吐鬱然蒼  
龍闕佳氣接南畝千官次第來豫色各眉宇記事以短  
篇不工還自許

雨

聽雨披衣襟衝雨踏晨鼓萬珠落筍輿詩中有新語老  
龍經秋卧歲暮始一舉成功亦何遲光彩變蔬圃道邊

聞井溢可笑遽如許舊山百尺泉不知旱與雨

幽牕

貧士工用短壯夫溺于詩破壁爲幽牕我筆還得持高  
鳥度遺影風扉語移時迨我休暇日與物聊同嬉古來  
賢哲人畎畝策安危一行或大謬半隱良亦癡寄言山  
中友即歲以爲期

休日馬上

休日不自休騎馬踏荒徑卻扇受景風今朝我無病春

雲闕晨耀羣綠淡相映山川與朝市一動自一靜九衢  
行萬人誰抱此懷勝不得與之語蕭蕭寄孤詠

小閣晨起

紙帳不知曉鴉鳴當吾興開牕面老松相對寒峻嶒幸  
無公家責欲嬾還不能汲井頽我面銅盆旋敲冰梳頭  
風入檻散髮霜滿膺四瞻郊澤間蒼烟慘朝凝卻望塔  
顛日光景舒層層乾坤有奇事變化忽相乘客來無可  
語語此不見謦今晨胡牀冷媿我無髒髯

小閣晚望

澤國候易變孟冬乃微和解襟凭小閣日暮歸雲多蒼  
蒼散草木莽莽雜山河荒野蟲亂鳴長空鳥時過萬象  
各無待惟人顧紛羅備物以養己更用干與戈天風吹  
我來衣袂生微波幽懷渺無寄蕭瑟起悲歌

詠江梅

風雪集歲暮江梅開不遲朝來幽牕底明璫綴青枝上  
天播淑氣百卉分四時寒村值西子足以昌吾詩



雪

窮臘見三白江南無舊聞天上春已暮盡日花續紛平生雖畏寒遇雪心所欣擁裘未敢出投隙致殷勤牕戶忽相照川陵已難分二儀有巨麗我老不能文高吟黃竹詩薄暮心無垠浮屠似玉筍突兀倚重雲

元夕

今夕天氣佳上天何澄穆列宿雨後明流雲月邊速空簷垂斗柄微吹生叢竹對此不能寐步繞庭之曲遙睇

浮屠顛數星紅煜煜悟知燒燈夕節意亦滿目歷代能  
幾詩偏賦雜珉玉棲鴉亦未定更鳴伴余獨百年滔滔  
內憂樂兩難復惟應長似今寂寞送寒燠

西軒

平生江海志歲暮僧廬中虛齋時獨步遡此西牕風初  
夏氣未變幽居念方沖三日無客來門外生蒿蓬輕陰  
映夕幌窈窕瓶花紅未知古今士誰與此心同

病骨

病骨瘦如輕清虛日來入今朝僧閣上超遙久風立茂  
林榴萼紅細雨驚黃濕物色乃可憐所悲非故邑

登閣

今日天氣佳登臨散腰腳南方宜草木九月未黃落秋  
郊乃明麗夕雲更蕭索遠遊吾未能歲暮依樓閣

歲華

歲華日已彫飛葉鳴古瓦白頭倚危檻高旻覆平野遙  
瞻疎柳林下有清溪瀉三春旣繁麗九秋亦瀟灑平生

萬事過所欠茅一把山川鬱日夕有抱無與寫賦詩老  
不工開篇詠風雅

偶成古調十六韻上呈判府兼贈劉興州

稽首蘓耽仙乘雲去無迹尚留橘井在與世除狂疾誰  
能不飲此識味亦可錄坐令鄭玄牛亦抱荆山玉偉哉  
稚川裔神交接朝夕游戲及小道造化入大筆優爲吳  
詩父雅命楚騷僕豈其橘井助本自同仙籙坐中子劉  
子知是當日客書懸元和腳語經建康力先我登公門

不數驚鳥百曾挹兩仙袖自然生羽翼嗟我無長才學  
架屋下屋詩雖兩牛腰事亦幾蛇足已窮猶不悔政荷  
師友德文盟儻許予幸不疑籍湜

再用迹字韻成一首呈判府

風雨一葉過黃花已陳迹人貧交舊疎歲暮日月疾貪  
人積胡椒智不到鬼錄那知庾郎菜地瘦飽金玉不加  
學服氣清坐了晨夕尚餘烟月債驅使入吟筆晚逢葛  
先生憐我出無僕借車得時詣謬窺文字錄談詩不知

疲或作夜半客揮毫寫珠玉治郡蓋餘力不羨江千萬  
不慕李八百願傳公句法容我附風翼城東劉子政著  
書方滿屋昨示一篇詩三日歎未足仍聞供筆硯家有  
樊通德但恐裴公門從此近捨湜元忠有待妾嘗謂某  
曰若人有可愛處吾  
嘗記書中事不審使之尋軌能知其處詩成  
或使之寫亦往往如人意陳學士願聞斯語

蒙示黃礪佳詩三讀欽羨輒繼韻仰報嘉賜

癡兒了官事官事那可訖豈知公偷閒臨水照纓紱雖

微八川雄暴怒常至沸

上林賦說八川云  
沸乎暴怒沸音弗儻或似山陰

清流可共被貪德實似濟行地不鬱鬱

一作地中

趙洛與陶

丘相比亦彷彿

禹貢濟水東出于陶丘北也

邂逅逢公賞一洗伏流

屈可愛不可唾衆議那可拂彼是公餘波本來非俗物

蒙示涉汝詩次韻

城南天倒影綠浪搖十里使君雲夢曾猶復錄此水舟  
行及雨霽秋色在葭葦烟涵翠縠潤月照金波委知公  
已忘機鷗鷺宛停峙向來趨熱士說似顙應泚俗子與  
清游自古劇函矢如何有雙腳受垢不受洗異哉公殊

嗜記此兩苦李詩成墮衡門名字汙紙尾

公詩賜某明及家弟也

當躡公迹佳處不待指會逢白沙渚我舍真可徙鳴騶  
儻重來傍舫傾我耳

再和

洪河豈不壯餘濶彌九里海內所詠歌在德不在水德  
人經行地可敬及蒲葦況有水如此浪去劇雪委念昔  
涉濤江怒鼉如山峙天風怖殺人舟定舡有泚惕然三  
夜夢沙礫下飛矢至今逢溝壑敢照不敢洗忽誦涉汝



詩五字擬蘇李快言擊汰事想見魚掉尾十年疑此樂  
始誤斗柄指便當策我足歲月忽轉徙未辦志和舟且  
洗子荆耳

遊峴山次韻三首

夜度一程雲平明踏山址山神豈妬我飛雨亂眸子重  
岳衮衮去前傑後俊偉晦明更百態始望那及此路窮  
得精廬稅駕谷祖始老僧千金意佳處相指似先生一  
笑領得句易翻水安石未歸山卻要山料理奇哉此一

段驚世無前軌酬山以快飲春巖正滋旨一丘儻許予  
高卧飽松髓城中謾挂笏那知有茲事

高人買山隱百萬猶恨少客兒最省事有屐一生了東  
莊良不遙十里望縹緲縈紆竝麥壟翠浪四山繞先生  
滯鹿車去程通鳳沼暫來山泉上思與飛雲杳雲北接  
雲南一逕絕紛擾竹林懷風雨目斷極窈窕從來無世  
塵相對真不撓龍兒爭地出頭角已表表先生囑支郎  
勿使斤斧天終當乞一杖險路扶吾老

轉路山突兀衆山之所望嬾融不下山揖山會虛堂

案前

第四卷印老索鈍菴詩云人言融  
公嬾一本改此嬾融作嬾慵非

大空出盤嬉小空時

侍旁我遊瞻鐵鳳力盡隨木羊石牕非人世意欲凌風  
翔巉巉牕中人出定髮有霜過眼幾浮烟關身一禪牀  
教我安心法入鳥不亂行似知使君尊起炷柏子香隴  
雲亦堪寄分我作歸裝好在牕前竹伴師老蒼蒼

再賦

堂堂李杜壇誰敢躡其址先生坐壇上持鉞令餘子出

來文字伯不但表奏偉高懷淡無嗜寓興或留此平生  
上林手避謗淹二始登臨意超然筆落風雨似事異柳  
司馬辛苦記山水樂哉邦無事那待猛政理駕言尉吾  
民不媿城門軌看山笑鄒湛句外寄深旨巖樹閱幾客  
尚餘堯時髓

宗炳登山詩長松列  
靖肅下凝堯時髓

撫板歌公詩未暇知

餘事

興公賦天台千字一何少峴山逢巧匠籠絡六詩了餘  
情到娘子心動雲縹緲髣髴山阿人薜荔一身繞殷勤

供泚筆路轉得龍沼應龍喜公來噓氣紛霧杳忽然張

蓋起知不受人擾

山有龍沼鄉人語曰峴山張蓋雨  
霽霽事出三水小牘霧杳出文選

詩

成中有畫幽情雜荒窈從公雖一快顧有和詩撓是事

姑置之歸路迷日表安得永茲樂彭鏗尚爲天但愁歸

城中念山令人老

脩眉入幽夢起費西南望

城中望山  
正在西南

終願學柳文買泉

築愚堂錯磨高壁翠日日在我旁忽在新野鄒行從泰

山羊城中瞻使君駕鶴高馳翔詩成墮人世字字含風

霜平生仰止勤不但上下牀顧許俗士駕平參丈人行  
封姨豈真予震怒挾阿香知公終可恃不記當趣裝清  
歡豈有極夜色來蒼蒼

秋月

袞暑推不去快風喜來過西榮遲明月與子聊婆婆初  
如金盤湧稍若玉鑑磨亭亭倚華魄濫濫舒凍波夜氣  
清入骨奈此光景何一杯幸相屬安能廢吟哦纖阿無  
停輪衰鬢颯已多及時會行樂無惜醉顏酡

寄題康平老眀柯亭

高懷志丘壑既足不願餘惜哉三徑荒滯彼天一隅小  
築聊自適空園闢榛蕪清影弔高槐氣與西山俱何以  
開子顏庭柯作森疎月露洗塵翳天風吹笙竽方其寓  
目時萬象供嘯呼終然成坐忘天地猶空虛券外果何  
有浮雲只須臾乃知鐘鼎豐未勝山林癯淵明死千年  
日月走名譽不肯見督郵歸來守舊廬可憐骨已朽後  
有誰繼渠願子副名實此事吾欲書





簡齋集卷六